

**Ulluunerani paaqqinnittarfinni tamani inimi ataatsimi atorfiit akuerisaasut  
minnerpaamik sisamangortinneqarnerisigut aningaasatigut, allaffissornikkullu  
kingunissaanik ersarissaasumik nassuiaasiornissaannik, Naalakkersuisut  
peqquneqarnissaannik Inatsisartut aalajangiiffigisassaattut siunnersuut**  
*Inatsisartunut ilaasortaq Pipaluk Olsen, Demokraatit*

**pillugu**

**siunnersuutip aappassaaneerneqarneranut**

**Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap**

**ISUMALIUTISSIISSUTAA**

Ataatsimiititaliap suliarinninnermini inuttarai:

Inatsisartunut ilaasortaq Nivi Heilmann Efraimsen, Inuit Ataqatigiit, siulittaasoq  
Inatsisartunut ilaasortaq Isak Johannessen, Naleraq, siulittaasup tullia  
Inatsisartunut ilaasortaq Margrethe Thårup Andersen, Demokratiit  
Inatsisartunut ilaasortaq Karen-Marie Kyed Frederiksen, Demokratiit  
Inatsisartunut ilaasortaq Nivi Rosing, Inuit Ataqatigiit

UPA2026-mi 29. april 2026 siullermeerinninnerup kingorna ataatsimiititaliap siunnersuut  
misissorpa.

**Siunnersuutip imarisaa siunertaalu**

Ulluunerani paaqqinnittarfinni tamani inimi ataatsimi atorfiit akuerisaasut minnerpaamik  
sisamangortinneqarnerisigut aningaasatigut allaffissornikkullu kingunerisassat pillugit  
nassuiaasioqullugit Naalakkersuisut peqquneqarnissaat siunnersuutikkut siunertarineqarpoq.

**Siunnersuutip Inatsisartunit siullermeerneqarnera**

Siullermeerinnermi partiit tamarmiusut Naalakkersuisullu siunnersuummut tapersiipput.  
Oqallinnermi ulluunerani paaqqinnittarfinnut suliassaqarfimmi akissarsiatigut  
atorfeqartitaanikkullu atugassarititaasut immikkut sammineqarput, tamatumani  
pitsanngorsaasoqarnissaanik pisariaqartitsisoqarnera isumaqatigilluarneqarluni, tamatumalu  
peqatigisaanik tamanna pillugu isumaqatiginninnerit suliffeqarnermi illuatungeriinnit  
ingerlanneqartussaasut erseqqissaatigineqarluni.

Sulisussaaleqinermik sulinermilu atugassarititigut artukkerneqarneq unammilligassatut annertuutut tikkuarneqarput. Illoqarfinni nunaqarfinnilu sulisussanik piginnaasalinnik amigaateqartoqarnera najukkamilu pissutsit assigiinnginnerat pissutigalugit siunnersuut piviusunngortinneqarsinnaanersoq isumakuluutigineqartoq oqaatigineqarpoq. Suliassaqarfimmi pissutsit pitsanngorsarniarlugit sulisussarsiortarnerup nukittorsarneqarnissaanik sulisunillu attassiniarnerup nukittorsarneqarnissaa periarfissanillu erseqqinnerusumik qulaajaanissaq pisariaqartinneqartoq erseqqissaatigineqarpoq.

Ulluunerani paaqqinnittarfinnut suliassaqarfiiit kommunalbestyrelsinit akisussaaffigineqartut erseqqissaatigineqarpoq aammalu sinaakkutit illoqarfiit nunaqarfiillu akornanni assigiinngissutsinut naleqqussakkat qulakkeerneqarnissaat kissaatigineqartoq oqaatigineqarluni. Kiisalu utoqqaat soraarnerussutisiatik paariinnarlugit ulluunerani paaqqinnittarfinni sulisinnaanerannut periarfissat misissorneqarnissaat soqutigineqarpoq.

Tamanna tunngavigalugu immikkoortoq Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamit suliarineqartussanngorlugu innersuunneqarpoq.

### **Siunnersuutip aningaasaqarnikkut kingunerisassai**

Aalajangiiffigisassatut siunnersuutit piviusunngortinneqarneranni aningaasaqarnikkut allaffis-sornikkullu kingunerisassat siunnersuutip tunngavilersuutitaani nassuiaatigineqartassasut Inatsisartut suleriaasianni § 33, imm. 1-imi allassimavoq. Siunnersuut piviusunngortinneqarpat aningaasaqarnikkut kingunerisassat nalunaarneqarsimasut ataatsimiititaliamit maluginiarneqarpoq, taamaalilluni taakku ukioq naallugu AC-fuldmægtigit atorfimmut ataatsimut naapertuunnissat naatsorsuutigineqarluni, tassa imaappoq 500.000 kr.-inut.

### **Ataatsimiititaliap siunnersuummut oqaaseqaatai**

Ulluunerani paaqqinnittarfinni atugassarititaasut pillugit siunissami oqallinnissani suliamut attuumassutilimmik patajaatsumillu tunngavissaqarnissap qulakkeerneqarnissaanik kissaateqarneq Naalakkersuisunit isumaqatigineqartoq ataatsimiititaliamit maluginiarneqarpoq.

Ataatsimiititaliaq naliliivoq ulluunerani paaqqinnittarfinni tamani inimi ataatsimi atorfiit akuerisaasut minnerpaamik sisamanngortinneqarnerisigut kingunerisassat pillugit nassuiaasiortoqarnissaanik aalajangiiffigisassat siunnersuummi siunnersuutigineqartoq ulluunerani paaqqinnittarfinnut suliassaqarfimmi sulinikkut atugassarititaasut nukittorsarniarnerini suliniuteqaqqinnissamat aallaavissatut naleqquttuullunilu atorluarneqarsinnaasoq.

Ataatsimiititaliamit oqaatigineqassaaq ulluunerani paaqqinnittarfinnut suliassaqarfimmi isumaqatigiissutinik isumaqatiginninniartarnerit suliffeqarnermi illuatungeriit suliassarimmatigit. Tamatuma peqatigisaanik ataatsimiititaliamit paasineqarpoq akissarsiatigut atorfeqartitaanikkullu atugassarititaasut pitsanngorsarneqarnissaannut naalakkersuinikkut ersarissumik piumassuseqartoqarmat.

Atorfiit akuerisaasut ikinnerpaaffeqalersinnerisigut kingunerisassanik qulaajaarnermi illoqarfiit nunaqarfiillu akornanni atugassarititaasut assigiinngitsuunerat isiginiarneqartariaqartoq immikkoortup oqaluuserineqarnerani oqaatigineqarpoq.

Kiisalu aamma maluginiarneqassaaq ulluunerani paaqqinnittarfinni ullumikkut ataatsimut isigalugu sulisussaaleqisoqareersoq, tamannalu pissutigalugu inimi ataatsimi sulisut sisamaanissaannik piumasaqaatip naammassiniarnera ajornakusoorsinnaassalluni. Tamatuma saniatigut ulluunerani paaqqinnittarfinnut suliassaqarfimmut akisussaaffik kommuninit aalajangersimasumik tigummineqarpoq.

**Ataatsimiititaliap inassuteqaatai**

- Ataatsimiititaliami amerlanerussutillit, Demokraatineersut aamma Inuit Ataqtigiinneersut, siunnersuut akuerineqassasoq inassutigaat.

Tamatuma peqatigisaanik nassuiaammi pissutsit kingulianiittut sammineqarnissaat qulakkeeqqullugu Naalakkersuisut ataatsimiititaliami amerlanerussutilinnit, Demokraatineersunit aamma Inuit Ataqtigiinneersunit, kaammattorneqarput:

- Ulluunerani paaqqinnittarfinni sulisut akissarsiaasa atorfeqartitaanermilu atugassarisaasa pitsanngorsarneqarnissaannik pisariaqartitsineq periarfissallu.
- Illoqarfiit nunaqarfiillu akornanni atugassarititaasut assigiinnginnerat.
- Sulisussarsiortarnermi sulisunillu attassiniarnermi ajornartorsiutit.
- Nunatta Karsiata kommuninut tapiissutaasa annertusineqarnissaannik pisariaqartitsineq.

Ataatsimiititaliap taama oqaaseqaateqarluni isumaliutissiisummilu allassimasutut paasinnil-  
luni siunnersuut aappassaaniigassanngortippaa.

---

Nivi Heilmann Efraimsen  
Siulittaasoq

---

Isak Johannessen  
Siulittaasup tullia

---

Margrethe Thårup Andersen

---

Karen-Marie Kyed  
Frederiksen

---

Nivi Rosing